

Innoi asuta podeis ligi, chi ndi agatais cosa agradèssia, is ***Gòcius de Santu Jacu e de Sant'Anna*** pigaus de su liburu scrittu de RICARDO SOLINAS e intitulau "*Feste e sagne nel Parteolla. Barrali, Dolianova, Donori, Monastir, Serdiana, Sestu, Soleminis, Ussana*", Grafiche Puddu, Senorbì 2001, càpius in is pàginas de sa de duxentus-cuìndixi a sa de duxentus-dexeseti (pp. 215-217).

GÒCIUS DE SANTU JACU

Prediletu de su Sennori
fiat Apòstulu cunsacrau.

*Siàis nostu abogau
Jacu Santu e intercessori.*

De su mari de Galilea
cun Giuanni ses partiu
A Gesus as ubidiu
po cunverti a sa genti ebrea,
cun Simoni, Perdu e Andria
ses de òminis piscadori.

*Siàis nostu abogau
Jacu Santu e intercessori.*

De sa primu cristianidadi
tui ses guida e siguresa
de sa Crèsia ses defesa
in s'esèmpiu de caridadi,
no timis contrariedadi
de Erodi persecudori.

*Siàis nostu abogau
Jacu Santu e intercessori.*

Po sa fidi decapitau
fiast martìriu curagiosu
e po custu ses gloriosu
in dònna terra invocau
e in Solèminis procrarau
de sa bidda defensori

*Siàis nostu abogau
Jacu Santu e intercessori.*

GÒCIUS DE SANT'ANNA

In tanta soberania
sollevada sentza de abusu.

*Anna mama de Maria
e ajaja de Gesus.*

Pranta de tanti balori
oi si tzèlebrat sa fama
a Maria dona po rama
de su Messia su frori
cun custu supremu onori
si cantat sèmpiri de prus.

*Anna mama de Maria
e ajaja de Gesus.*

Mama de sa mellus filla
filla de sa mellus mama
nebodi su prus de fama
issa de coru sintzilla
fedeli, ùmili e trancuilla
a nemus lassat delusu.

*Anna mama de Maria
e ajaja de Gesus.*

Nàscia de sa mellus arrosa
de su mellus lillu sa pranta
de sa creatura prus santa
mama sa prus gloriosa
cun devotzioni piedosa
a nisciunus lassat confusu.

*Anna mama de Maria
e ajaja de Gesus.*

Anna sposa de Gioachinu
su nonnu de su Redentori
grandesa, gloria e amori
ses frori de gelsominu
in preghiera de continu
e nisciunus siat esclusu.

*Anna mama de Maria
e ajaja de Gesus.*